

► *Den cuadro di proyecto di ruta cultural*

Museo Numismático lo bai muda den casita histórico di Aruba Bank

Intencion di gobierno ta pa Cas Ecury bira Museo Nacional

ORANJESTAD - Durante un conferencia di prensa cu a tuma lugar den sala di reunion di despacho di minister di Deporte, Labor y Cultura, Ramon Lee, e mandatario a papia riba e uso cu nan lo bai haci di e diferente edificionan histórico cu a wordo restaura ultimamente.

Den cuadro di nan proyecto hopi ambicioso di bin cu un ruta cultural, e edificio histórico cu a wordo muda for di nos caya principal te na Weststraat conoci como casita Eman of Casita di Aruba Bank lo wordo destina pa Museo Numismático Aruba cu pronto lo cuminsa funciona den su sede nobo.

Encuanto e Cas Ecury, otro patrimonio histórico di nos pais, minister Ramon Lee a bisa cu nan a cuminsa papia cu e doñonan pasobra tur e area ei nan kier cumpra e edificionan y haci nan museo p'asina nos por propaganda nos turismo tambe. E ta bisa cu e doñonan ta exagera den nan prijs, y esei ta e problema cu ta stroba nan pa bin cu e proyecto aki.

Sin embargo ta existi un interés grandi di gobierno di adkiri e propiedadnan aki na beneficio di nos cultura, pero di nos turismo tambe y pesei ya caba e arquitectonan ta trahando riba e mapa di renovacion di edificio Ecury, y nan ta spera cu pa fin di aña nan lo bin cla.

MUSEO DI ARTE

Den pasado e gremio di artistanan plástico a propone pa destina e Cas Ecury pa crea un museo di arte moderno, caminda regularmente nan por expone nan obranan di arte y organisa bienal tambe.

Minister Lee a señala cu e joya arquitectónico aki lo wordo destina pa e Museo Arqueológico. El a bisa cu su intencion inicial ta pa muda Museo Arqueológico den edificio aki cu pronto lo wordo

renova. Encuanto e proposicion di e artistanan local, e mandatario a declara cu tin un lugar habri, y nan ta bezig si gobierno por cumpra, y einan nan kier traha un edificio moderno unda nan lo pone e galeria pa exposicionnan di arte contemporáneo.

Director di Oficina di Monumento Nacional, sra. Yvonne Webb-Kock a agrega cu den e diseño di e Museo Nacional cu ta den su fase preliminar, es decir na december eventualmente nan lo haya tur e mapanan, tambe tin un espacio di mas of menos 130 meter cuadra cu lo bai destina pa arte contemporáneo. Esei lo wordo maneha dor di Instituto di Cultura y e ta spera cu dor e proyecto aki nos artistanan local lo wordo honra p'asina nan lo tin un espacio unda nan por expone nan obranan.

Minister Lee a compromete

su mes pa e artistanan plástico por haya un bon lugar unda nan por expone nan obranan. "Minister di Cultura ta sostene nan, y mi ta apoya nan all the way", asina e mandatario Ramon Lee a bisa.

PARKE NACIONAL

Na concepto di minister Ramon Lee, nos Parke Nacional Arikok lo bai contribui tambe na nos turismo. E ta bisa cu por lo menos mil turista ta bishita pa luna nos parke nacional y e comentario cu nan ta ricibi ta hopi positivo y ta hustifica pa sigui cu e proyecto aki den cuadro tambe di promove diversidad pa nos bishitantenan y eco-turismo. E mandatario ta kere cu un tiki di inversion y un tiki mas profesionalismo di e guianan, nos lo beneficia hopi di e Parke Nacional.